

Date – 11/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. 166th Infantry Batallion, Territorial Army (Home & Hearth) Assam a tang tura lak thar Mizo thalai te thlahna hun vawiin khan Chief Minister Pu Lalduhoma hovin hman a ni .
2. State Level DISHA Committee (SLDC) Meeting chu an Chairman, Chief Minister Pu Lalduhoma kaihhruaiin vawiin khan Aizawlah an thukhawm.
3. Prime Minister Narendra Modia hovin vawiin khan Gujarat-a Somnath Temple ah Somnath Amrutparv hman a ni
4. Sawrkar laipui chuan vawiin khan Viksit Bharat-Guarantee for Rozgar and Ajeevika Mission (Gramin) Act, 2025 (VB-G RAMG) hman tan anih tur thu hriattirna a tichhuak



TERRITORIAL ARMY

Tunhnaia Mizo thalai 144 te 166th Infantry Batallion, Territorial Army (Home & Hearth) Assam a tang tura lak thar batch hmasa ber te thlahna hun vawiin khan Assembly Annexe Building ah Chief Minister Pu Lalduhoman hovin hman a ni a,

He hun hmanpuitu Chief Minister Pu Lalduhoma chuan thusawiin, he ni hi Mizoram tana ni lawmawm leh chhinchhiahtlak a ni a ti a. Territorial Army chu a awm tih pawh tunhmain a lo la hriat ngai loh thu leh, hriat a nih rualin central sorkar thuneitute hnenah Mizo Battalion pe ve turin an dil nghal a. A tirah mi 70 lak phalsak an ni a, a taka lak anih hmain an dil belh leh a, mi 144 lak phalsak a ni ta tih a sawi a. A dang lak belhna tur hmalakna an buaipui leh mek bawk tih a sawi.

Chief Minister chuan, Mizo thalai, a tam thei ang ber lut se, eizawna a nih piah lamah ram venhimna hna a ni a, a zahawm a, nunkawng kaihruaitu tha a ni a, thahnem ngaih ana hle a ti a, vawiina training tura vailiam tak thalai mi 144 te chu hmahruaitu, Mizo thalaite hmelhmang tilangtu tur an nih avangin theihtawp chhuah turin beisei an ni a, an kalna apiangah zo nun ze mawi tak takte lantir zelin, ram leh hnam timawitu nih tum tlat turin a chah a ni.

Home Minister Pu K.Sapdanga pawhin thusawiin, Territorial Army hian thiamna leh sipai discipline tha a keng dun a, zahawmna leh hmingthanna a thlen theih bakah nungchang siamthatnate a keng a. A tha em em a ni, a ti a. He hnaa tling tharte lawmpuiin theihtawp chhuah zui tur leh an mawhpurhnate hlen ngei turin a chah a. Training laia an lo hnual deuh a nih pawhin, 'Kawng bumboh leh harsa hian hmun mawi takah min hruai thin a ni,' tih hre reng turin a chah a ni.

166 Infantry Battalion Territorial Army (Home & Hearth) a thawk tur, Mizo thalai thlan chhuah mi 144 te hi mipa 135 leh hmeichhia 9 an ni a, Thla thar atang khian training an nei tan dawn a. Chu mi hmaa tihfel ngaite tifel turin tun thla laihawl hian Shillong an pan phawt ang a. Mipa 135 te hian Shillong-ah Training an nei zui ang a, hmeichhia 9 te hian Bangalore-ah training an kal thung ang. Vawiina thlahna hunah hian MLA Lt. Col. Clement Lalhmingthanga chuan Territorial Army atan lak belh an dil leh mek a, kumin September thlaa Advertisement tihchhuah hman an beisei tih a sawi a ni.

<><><>

STATE LEVEL DISHA MEETING

State Level DISHA Committee (SLDC) Meeting chu an Chairman, Chief Minister Pu Lalduhoma kaihhruaiin vawiin khan Aizawlah an thukhawm a,

Chief Minister chuan Central Scheme kalpuinaah Dept ten an lehkha thehluhte an umzui chak a ngai tih a sawi a, sorkar laipuiin central scheme sum hman dan leh inpek dan kalphung thar SNA-SPARSH a hman tak hnuaah Financial Year tawpa Account ti zero thei lo department an awm avanga harsatna an tawh ang chu thleng tawh lo se a ti a ni.

He meeting-ah hian Chief Minister hmalaknaa Mat Multipurpose Dam buaipui mek chu cheng vbc 274 senna tur project duan fel a nih thu tarlan a ni a. Ruahman danah chuan tuikhuah hi meter 29 a sang, hectare 700 a zau leilet a chawm thei, Power siamna awm, Eco-Tourism kalpui theihna tura duan a ni a. Brahmaputra Board ten a thawhna tur sum an dap zui dawn a ni.

Meeting-ah hian Central Scheme thawk department hrang hrang ten FY 2025-26 a an hmalakna leh an hlawhtlinnate thlirho a ni a. Report a tarlan a nih danin, MGNREGA hnuaiah chhungkaw 62,193 ten ni 100 inhlawhna an thawk a. Central sorkar chuan he scheme hi VB GRAMG tia a thlak dawn avangin a kalpuina tur Mizoram Scheme hi duan fel tawh a ni a. Cabinet Meeting-in a ngaihtuah tura thehluh a ni.

PMAY G 2.0 kalpuina turin Mizoramah survey neih zawh tawh a ni a. Chhungkaw 54,601 te chu he tanpuina dawng thei tura ngaih an ni. PMAY G sum central-in a pek chhuah dan hi Mizoram kalphung nen a inmil tawk lo nia ngaih a ni a. SAGY (Model Village) hmalakna chu engkim thawh zawh tawh a ni a, khar tawh mai ni se an ti a ni.,

AH & Vety hnuaiah Animal Insurance under National Livestock Missions kalpui mek a ni a. Mi 700 velin insurance hi an ti tawh a. Chu chu ti tura beisei zat atanga zaa sawm vel chauh an ni a. Uar zawka awareness kalpui ni se, an ti.

National Health Missions report atanga a lan danin sorkar kum kalta chhunga nu naupai inziaklut zawng zawng zat chu 20,137 an ni a. Damdawiina nau nei hi 17,201 an ni. Nau piang hlim boral hi 285 an awm a, Infant Mortality Rate (IMR) hi 15 a ni a. 16 aia hniama awm hi target mek a ni a, target hi hlen a ni.

Meetingah hian Member MP (Lok Sabha) Pu Richard Vanlalhmangaiha, MP (Rajya Sabha) Pu K. Vanlalvena te bakah MLA te leh official te an tel a ni.

<><><>

E STAMPING

Ram lei leh hralh bakah inremna hrang hrang siam nana hman thin Non Judicial stamp paper aiah e-stamping hman a nih theih nan Land Revenue & Settlement Department leh Stock Holding Corporation of India ten thawh hona thuthuthlung wawiin khan an ziak.

He thawhhona thuthlung hi Revenue Minister pisaah ah ziah niin Mizoram Sawrkar aiawhin Revenue Secretary Pu Vanlalmawia leh SHCIL aiawhin Regional Manager (East & North East) Pu Pritesh Kumar ten hming an ziak a ni.

Thu sawiin Minister Pu.B.Lalchhanzova chuan ram emaw, in leh lo emaw, lei leh hralh bakah mimal leh pawl inkara inremna siam nemngheh nan Non judicial stamp hman thin niin, stamp paper awm sa a zawh chang te, denomination mamawh ang a awm loh chang te a awm thin bakah stamp paper lem siam an lo awm thin tih sawiin Revenue Minister chuan heng harsatna te hi nuaibo a nih theih nan June ni 2, 2024-khan sawrkar chuan The Mizoram Stamp Rules siam tha -in electronic hmanga stamp duty pek phal a ni, tih a sawi a; chumi bawhzuina atan thawhhona thuthlung ziah a lo ni ta a ni, a ti.

Minister chuan Stamp duty chu State Sawrkar chan liau liau a nih angin a lakkhawm kawngah thahnem ngaih a tul thu sawiin kum 2024/25 a Stamp Duty tlingkhawm chu vbc 13.45 a ni a, kum 2025/26 ah chuan vbc 20.2 ah a pung a ni, a ti a. Kum 2026/27 chhungin Finance Department chuan stamp duty atangin cheng vbc 22.5 a bituk a, e-stamping hman a nih dawn tak piah lamah Sub Division level a Sub Registration Office hawn a nih tak avangin Finance Department bituk zat hi khum ngei an inbeisei thu a sawi a ni.

VC

E-stamping hi a bul tan nan Aizawl District ah Pilot project atan kalpui a ni dawn a. A tahtawlin District dangah pawh kalpui vek a ni ang. Pilot project hi ni 45 chhunga tihfel tura duan a ni a. A hlawhtlin hunah chuan mahni awm hmunah emaw, Accredited collection centre atangin emaw, stamp duty chu pek theih a ni tawh dawn a. Stock Holding Corporation of India Regional Manager Pu Pritesh Kumar-a chuan Estamping hman anih chuan stamp indaihlo leh chatlak a awm tawh dawn lo a. Stamp duty hralhna leh leina bo thlau pawh a nuai bo dawn a ni a ti.

<><><>

WEATHER

Aizawl leh Lengpui chu a lum lai berin celsius degree 30 a ni a, Aizawlah hian a vawh lai berin Celsius degree 17 a ni.

Aizawl ah tih tham ruah a sur lova, Lengpuih chuan 13.4 mm vel a tla a, ni 3 lo kal tur chhung hian Aizawl, Mamit leh Kolasib bakah Chjamphai Dist hmun thenkhatah ah te ruahsur thei reng a ni a, thli leh tek te nen a thawh theih avangin mipuite fimkhur turin Indian Meteorological Dept Aizawl Director Pu Sudhher Kumar Dwivedi an a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia hovin vawiin khan Gujarat-a Somnath Temple ah Somnath Amrutparv hman a ni a. He hunah hian Prime Minister Modia hian tawngtaina leh puja-na hun a hmang a ni. Vawiina Amrutparv hi Somnath Temple tuaithar anih leh hnua a kum 75 na a ni a. Thusawiin Prime Minister Modia chuan Somnath Temple chu rinna meichher chhi eng tu anih thu sawiin rampum huapa thlarau leh sakhuana chhinchhiahna pawimawh tak a ni a ti. Pu Modia chuan Amrutparv chu hun kaltawh hriatrengna mai niloin kum sangkhat lo la awm leh tur thlenga ngaihtuahna kaihruaitu a ni dawn a ti bawk.

<><><>

VB-G RAM G

Sawrkar laipui chuan vawiin khan Viksit Bharat-Guarantee for Rozgar and Ajeevika Mission (Gramin) Act, 2025 (VB-G RAMG) hman tan anih tur thu hriattirna a tichhuak. He dan thar hi July ni 1 atangin rampumah hman a ni dawn a. Union Rural Development Ministry sawidanin he dan tharah hian kumkhatah ni 125 inhlawhna siam a ni tawh dawn a. Hei hian thingtlang chhungkaw tam tak tan sum tam zawk thawhchhuahna tur a siam belh ang a ti a. Tun sawrkar kumah hian cheng vaibelchhe sing 9 sang 5 leh 692 ruahman a ni a. Kum tam tak lo hman tawh MGNREGA a rawn thlak dawn a ni.

<><><>